

आकाशवाणी जयपुर—अजमेर

प्रादेशिक समाचार

- वित्त मंत्री निर्मला सीतारमन संसद मांय नरेन्द्र मोदी सरकार रा तीजा कार्यकाल रो पहलो बजट पेश कीनो।
- प्रधानमंत्री नरेन्द्र मोदी बजट ने समाज रा हर तबका ने ताकत देवण वाळो बतायो।
- राज्यपाल कलराज मिश्र रेडक्रॉस ऊं खूनदान सागे अंगदान, देहदान अर नशा मुक्ति सारू काम करण बाबत कह्यो।

अर

- बारां जिला मांय स्कूली छात्रावां रा बेहतर स्वास्थ्य सारू पोषित लाडो अभियान सरू करीज्यो।

000

वित्तमंत्री निर्मला सीतारामण आज लोकसभा मांय नरेन्द्र मोदी सरकार रा तीजा कार्यकाल रो पैलो पूरो बजट पेश कीनो। माली साल 2024—25 रा आम बजट मांय वित्तमंत्री नुवी कर व्यवस्था रा तैत नौकरी पेशा लोगां सारू स्टैंडर्ड डिडक्शन मानक कटौती 50 हजार ऊं बधा र 75 हजार रुप्या सालाना करण रो प्रस्ताव कीनो। बजट मांय तीन लाख रुप्या सालाना ताई री आमदनी परां कोई टैक्स नी

लगावण रो प्रस्ताव करी ज्यो है। तीन ऊं सात लाख रुप्या ताई री आमदनी परां पांच फीसदी, सात ऊं दस लाख रुप्या सालाना ताई री आमदनी परां दस फीसदी, दस ऊं बारह लाख रुप्या ताई री आमदनी परां पन्द्रह फीसदी, बारह ऊं पंद्रह लाख रुप्या सालाना ताई री आमदनी परां बीस फीसदी अर पंद्रह लाख रुप्या सालाना ऊं बत्ती आमदनी परां तीस फीसदी री रेट ऊं टेक्स लगावण रो प्रस्ताव बजट मांय करी ज्यो है। बजट मांय नौकरी देवण वाळा री मदद सारु कर्मचारी री एक महीना री तनख्वाह सब्सिडी रा तौर ऊं देवण रो प्रस्ताव करी ज्यो है। ई सागे ई बणाई—चुणाई रा हलका मांय और नौकरियां देवण अर नौकरी देवण वाळां माथे खास ध्यान देवण रो प्रस्ताव ई करी ज्यो। वित्त मंत्री बजट मांय खेती—बाड़ी अर इण ऊं जुड्या हलकां सारु एक लाख 52 हजार करोड़ रुप्या रो प्रावधान करण रो प्रस्ताव कीनो। वे गांवाई हलकां मांय बुनियादी ढांचा विकास अर इण ऊं जुड्या कामां माथे दो लाख 66 हजार करोड़ रुप्या रो प्रावधान करण रो ऐलान कीनो। वे आवता दो साल मांय देशभर मांय एक करोड़ किसानां ने प्राकृतिक खेती सारु मदद दी जावेला।

वित्तमंत्री जनजातीय समुदायां री सामाजिक अर माली हालत मांय सुधार सारु प्रधानमंत्री जनजातीय उन्नत ग्राम अभियान चलावण रो ऐलाण कीनो। वे कह्यो के महिलावां री अगुवाई मांय विकास ने बधावो देवण रा मकसद ऊं महिलावां रा फायदा री न्यारी—न्यारी योजनावां सारु तीन लाख करोड़ रुप्या ऊं बत्ती रकम राखण रो ऐलाण कीनो। वित्तमंत्री कह्यो के सरकार प्रधानमंत्री आवास योजना रा दूजा दौर रा तैत शहरां मांय गरीब अर मझला तबका रा एक करोड़ पिरवारां री मकान री जरूरत पूरी करण सारु दस लाख करोड़ रुप्या लगावेला।

0000

वित्त मंत्री निर्मला सीतारमन कानी ऊं आज लोकसभा मांय पेश करी ज्या बजट प्रस्तावां माथे प्रतिक्रिया देता थकां प्रधानमंत्री नरेन्द्र मोदी बजट ने हर तबका ने ताकत देवण वाळो बतायो। एक वीडियो संदेश मांय प्रधानमंत्री कह्यो के ई बजट ऊं भारत ने दुनिया रो विनिर्माण केन्द्र बणावण मांय मदद मिलेला।

.....

रक्षा मंत्री राजनाथ सिंह अर संसदीय कार्य मंत्री किरेन रिजीजू बजट ने जनता रा सपना सांचां करण वाळो बतायो। केंद्रीय संस्कृति अर पर्यटन मंत्री गजेंद्र सिंह शेखावत कह्यो के बजट मांय नौकरियां, कौशल विकास, कारोबार अर उद्योग जगत अर समाज रा मझला तबका री जनता सारू आगे बधबा रा मौका मुहैया करावण रा प्रस्ताव करी ज्या है। केन्द्रीय मंत्री अश्विनी वैष्णव बजट मांय एम.एस.एम.ई हलका सारू करी ज्या ऐलाण री सराहवणा कीनी।

.....

मुख्यमंत्री भजन लाल शर्मा कह्यो के केन्द्रीय बजट भारत ने वैश्विक विकास रो अगाडी देश बणावण रो रोडमेप है। भाजपा रा आला नेता राजेन्द्र राठौड़ बजट ने ऐतिहासिक अर क्रांतिकारी बताता थकां कह्यो के सरकार रो ध्यान गरीब, महिला, किसान अर नौजवानां समेत हर तबका री उम्मीदा पूरी करण माथे है। दूजी कानी कांग्रेस पार्टी बजट री आलोचना करता थकां कह्यो के इण मांय आमदनी री असमानता दूर करण सारू कोई प्रस्ताव पेश नी करी ज्यो है। संसद भवन रे बाहर खबरनवीसां सागे बातचीत करता थकां कांग्रेस रा नेता शशि थरूर कह्यो के बजट मांय मनरेगा रुं जुड्यो कोई प्रस्ताव नी करी ज्यो है। प्रदेश कांग्रेस अध्यक्ष गोविन्द सिंह डोटासरा बजट ने निराश करण वाळो बतायो।

.....

राज्य रा पैली वाळा मुख्यमंत्री अशोक गहलोत राजस्थान सारू बजट मांय कोई खास ऐलाण नी करण परां निराशा जतायी। पैली वाळा उपमुख्यमंत्री सचिन पायलट कह्यो के बजट मांय ईआरसीपी अर यमुना लिंक परियोजनावां सारू कोई एलाण नी करणो प्रदेश री जनता सागे छलावो है। ई बीचे कारोबार जगत आज पेश करी ज्या केंद्रीय बजट रो स्वागत कीनो है।

कारोबारियां रा संगठन फिक्की रा अध्यक्ष अनीश शाह कह्यो के बजट विकास करण वाळो है जिण मांय नौजवानां, महिलावां अर किसानां समेत केई हितधारकां माथे खास ध्यान दियो ज्यो है। फिक्की रा विशेष समूह रा पदाधिकारी अजय डाटा कह्यो के ओ विकास ने गति देवण वाळो बजट है।

.....

कारोबारियां रा एक और संगठन एसोचैम रा महासचिव दीपक सूद केंद्रीय बजट ने संतुलित बताता थकां कह्यो के बजट विकसित भारत बणावण मांय मददगार साबित व्हेला। बजट माथे जनता री प्रतिक्रिया ई मिली है। जयपुर रा नौजवान राजू मीणा बजट मांय करी ज्या प्रावधान ने बेहतरीन बताया है।

000000

राज्यपाल कलराज मिश्र प्रदेश री ज़िला रेडक्रॉस शाखावां ऊं खूनदान शिविरां सागे अंगदान, देहदान अर नशा मुक्ति सारु ई काम करण बाबत् कह्यो है। वे टी.बी. मुक्त भारत अभियान रा तैत रेडक्रॉस सोसायटी रा सदस्यां कानी ऊं निक्षय मित्र बणा र राजस्थान ने टी.बी. मुक्त करण माथे ई ज़ोर दीनो। वे आज जयपुर मांय राजभवन मांय राख्यी ज्या इंडियन रेडक्रॉस सोसायटी, जनजातीय क्षेत्र विकास तथा विश्वविद्यालय ऊं जुड़्या स्थानीय मुद्दां री खास समीक्षा बैठक मांय बोल रह्या हा। मीटिंग मांय राज्य रा सगळा संभागीय आयुक्त अर सगळा ज़िलां रा ज़िला कलेक्टर ऑनलाइन तरीका ऊं शामिल व्ह्या।

000

बारां जिला मांय आज पोषित लाडो अभियान सरु करी ज्यो। स्कूली टाबरियां रा स्वास्थ्य ऊं जुड़्या ई अभियान रो उद्घाटन जिला कलेक्टर रोहिताश्व सिंह तोमर कस्तूरबा गांधी आवासीय विद्यालय मांय कीनो। जिला कलेक्टर बतायो के 3 महीना ताई चालण वाळा ई अभियान रा तैत जिला रा न्यारा-न्यारा छात्रावासां मांय रेह र पढ़ाई करण वाळी अर स्कूलां मांय पढबा वाळी छात्रावां री स्वास्थ्य जांच करी जावेला। वे बतायो के छात्रावां ने जरूरी पोषण देवण सागे वां रा ईलाज माथे ई ध्यान दियो जावेला। ई मौके चिकित्सा विभाग री ओर ऊं छात्रावास मांय रह रही टाबरियां री एनीमिया जांच करी ज्यी।

0000

सुप्रीम कोर्ट ने आज पेपर लीक अर अनियमिततावां रा आधार ऊं नीट-यूजी 2024 परीक्षा रद्द करण ऊं नट ग्यो है। मुख्य न्यायाधीश न्यायमूर्ति डी.वाई. चंद्रचूड़, न्यायमूर्ति जे.बी. पारदीवाला अर न्यायमूर्ति मनोज मिश्रा री पीठ ई बारा मांय केई याचिकावां री सुणवाई करता पाछे ओ हुकम दीनो। अदालत कह्यो के पेपर लीक प्रणालीगत हो

जिण ऊं पूरी परीक्षा री पवित्रता प्रभावित हो रही ही, ई बारा मांय कोई सबूत पेश नी करी ज्यो।

0000

प्रदेश मांय कठे-कठे आज ई बिरखा व्हेवण रा समाचार है। सवाईमाधोपुर मांय दोपहरां री बगत व्ही बिरखा पाछे सीळो बायरो बाजण ऊं गर्मी ऊं साता मिली। जयपुर अर आरे-सारे रा हलकां मांय हल्की बिरखा व्ही। मौसम विभाग आज भरतपुर, जयपुर अर कोटा संभाग अर शेखावाटी हलका मांय कठे-कठे जोरदार मेह व्हेवण अर एक-दो ठोड़ां घणी जोरदार बिरखा रा आसार जताया है। महकमो आज जयपुर अर दौसा सारू बिरखा रो ऑरेंज अलर्ट जारी कीनो है। ई सागे ई सवाईमाधोपुर, करौली, कोटा, अलवर, झालावाड़, बूंदी, बारां, राजसमंद अर भीलवाड़ा जिलां सारू यैलो अलर्ट जारी करी ज्यो है।

00